

四庫全書

集部

欽定四庫全書

集部

漢魏六朝百三家集卷九

十

詳校官庶吉士臣謝恭銘

主事銜臣徐以坤覆勘

總校官檢討臣何思鈞

校對官編修臣吳舒帷

謄錄監生臣黃鑫

欽定四庫全書

漢魏六朝百三家集卷九

漢劉歆集題詞

王莽篡漢甄豐劉歆王舜為其腹心豐舜不足
道歆宗室宿儒胡為僕僕符命同賣餅兒也甄
尋之變劉棻兄弟三人皆死歆始怨懼後與王
涉董忠謀誅莽徬徨大白漏言婦人遂自殺也
班史謂歆初心輔莽圖富貴謀至加號安漢宰

衡而止事不出於居攝即真以後內畏不安懷
變有日此固寬為之辭然論歆罪幽州羽山流
殛猶小矣子政三子皆好學長子伋以易教授
官至郡守中子賜九卿丞早卒而少子歆最知
名令歆繼父業校秘書領五經死於哀帝之世
官以都尉終其名豈不出兩兄上而冒榮國師
投跡亂逆悲乎其壽也左傳未立移書責讓子
雲為友求索方言至洪範傳著天人七略綜百

家三統歷譜考步日月五星此非古鉅儒耶讀
其書益傷其人則有掩卷爾

目錄

賦

遂初賦

甘泉宮賦

燈賦

書

移太常博士書

答文學

與揚雄求方言書

議

武帝廟不宜毀議

太上惠景寢園議

王莽服母總纁議

奏

上鄧析子

說

三統歷說

論

新序論

傳

洪範五行傳

漢魏六朝百三家集卷九目錄

欽定四庫全書

漢魏六朝百三家集卷九

明 張溥 輯

漢劉歆集

賦

遂初賦

遂初賦者劉歆所作也歆少通詩書能屬文成帝召為
黃門侍郎中壘校尉侍中奉車都尉光祿大夫歆好左

氏春秋欲立於學官時諸儒不聽歆乃移書太常博士責讓深切為朝廷大臣非疾求出補吏為河內太守又以宗室不宜典三河徙五原太守是時朝政已多失矣歆以論議見排擯志竟不得之官經歷故晉之域感今思古遂作斯賦以歎往事而寄已意

昔遂初之顯祿兮遭閭闔之開通蹠三台而上征兮入北辰之紫宮侍列宿於鉤陳兮擁太常之樞極總六龍於駟房兮奉華蓋於帝側惟太階之侈濶兮機衡為之

難運懼魁杓之前後兮遂隆集於河濱遭陽侯之豐沛
兮乘素波以聊戾得玄武之嘉兆兮守五原之烽燧二
乘駕而既俟僕夫期而在涂馳太行之嚴防兮入天井
之喬關歷崗岑以升降兮馬龍騰以起攄舞雙駟以優
遊兮濟黎侯之舊居心滌蕩以慕遠兮迴高都而北征
劇彊秦之暴虐兮吊趙括於長平好周文之嘉德兮躬
尊賢而下士駕四馬而觀風兮慶辛甲於長子哀衰周
之失權兮數困辱而莫扶執孫蒯于屯留兮救王師於

余吾過下虎而歎息兮悲平公之作臺背宗周而不卹
兮苟偷樂而情怠板葉落而不省兮公族閒其無人曰
不悛而愈甚兮政委棄於家門載約屨而正朝服兮降
皮弁以為履寶礫石於廟堂兮面隨和而不眊始建衰
而造亂兮公室繇此遂卑憐後君之寄寓兮唁靖公之
銅鞮越侯田而長驅兮釋叔向之飛患悅善人之有救
兮勞祁奚於太原何叔子之好直兮為羣邪之所惡賴
祁子之一言兮幾不免乎徂落靈美不必為偶兮昔有

羞而不相及雖韞寶而求價兮嗟千載其焉合昔仲尼
之淑聖兮竟隘窮乎陳蔡彼屈原之貞專兮卒放沉於
湘淵何方直之難容兮柳下黜而三辱遽瑗抑而再犇
兮豈材知之不足揚蛾眉而見妒兮固醜女之情也曲
木惡直繩兮亦小人之誠也以夫子之博觀兮何此道
之必然空下耑而矐世兮自命已之取患悲積習之生
常兮固明智之所別叔羣既在阜隸兮六卿興而為桀
荀寅肆而顓恣兮吉射叛而擅兵憎人臣之若茲兮責

趙鞅於晉陽軼中國之都邑兮登句注以陵厲歷雁門
而入雲中兮超絕轍而遠逝濟臨沃而遙思兮忽垂意
乎邊都埜蕭條以寥廓兮陵谷錯以盤紆飄寂寥以荒
眇兮沙埃起而杳冥迴風育其飄忽兮迴颭颭之泠泠
薄涸凍之凝滯兮葦谿谷之清涼漂積雪之皚皚兮涉
凝露之隆霜揚電霰之復陸兮慨原泉之凌陰激流澌
之漻漻兮窺九淵之潛淋颭悽愴以慘怛兮憾風漻以
瀏寒獸望浪以穴窺兮鳥脇翼之浚浚山蕭瑟以鳴鳴

兮樹木壞而哇咿地坼裂而憤急兮巨石破之崑崙天
烈烈以厲高兮廖瑋牕以梟牢雁邕邕以遲遲兮埜鶴
鳴而嘈嘈望亭隧之皦皦兮飛旂幟之翩翩回百里之
無家兮路脩遠之緜緜於是勒障塞而固守兮奮武靈
之精誠攄趙奢之策慮兮威謀完乎金城外折衝以無
虞兮內撫民以永寧既邕容以自得兮唯惕懼於竺寒
攸潛溫之玄室兮滌濁穢於太清反情素於寂寞兮居
華體之冥冥玩書琴以條暢兮考性命之變態運四皆

而覽陰陽兮總萬物之珍恠雖窮天地之極變兮曾何
足乎留意長恬澹以懽娛兮固聖賢之所喜亂曰處幽
潛德含聖神兮抱竒內光自得真兮寵幸浮寄竒無常
兮寄之去留亦何傷兮大人之度品物齊兮舍位之過
勿若遺兮求位得位固其常兮守信保已比老彭兮

甘泉宮賦

載杭文

軼陵陰之地室過陽谷之秋城迴天門而鳳舉躡黃帝
之明庭冠高山而為居櫟崑崙而為宮按軒轅之舊處

居北辰之閭中背共工之幽都向炎帝之祝融封巒為
之東序緣石闕之天梯桂木禡而成行芳肸蠁之依依
翡翠孔雀飛而翱翔鳳皇止而集栖甘醴湧於中庭兮
激清流之瀾瀾黃龍遊而蜿蜒今神龜沉於玉泥離宮
特觀接比相連雲起波駭星布彌山高巒峻阻臨眺曠
衍深林蒲葦涌水清泉芙蓉菡萏菱荇蘋繁豫章楸木
梗松柞棧女貞烏勃桃李棗欂

燈賦

載執文

惟茲蒼鶴修麗以奇身體剡削頭頸委蛇負斯明燈躬
含水池明無不見照察纖微以夜繼晝烈者所依

書

移太常博士書

昔唐虞既衰而三代迭興聖帝明王累起相襲其道甚
著周室既微而禮樂不正道之難全也如此是故孔子
憂道之不行歷國應聘自衛反魯然後樂正雅頌乃得
其所脩易序書制作春秋以紀帝王之道及夫子沒而

微言絕七十子終而大義乖重遭戰國棄籩豆之禮理
軍旅之陳孔氏之道抑而孫吳之術興陵夷至于暴秦
燔經書殺儒士設挾書之法行是古之罪道術由是遂
滅漢興去聖帝明王遐遠仲尼之道又絕法度無所因
襲時獨有一叔孫通略定禮儀天下唯有易卜未有它
書至孝惠之世乃除挾書之律然公卿大臣絳灌之屬
咸介胄武夫莫以為意至孝文皇帝始使掌故朝錯從
伏生受尚書尚書初出于屋壁朽折散絕今其書見在

時師傳讀而已詩始萌芽天下衆書往往頗出皆諸子傳說猶廣立於學官為置博士在漢朝之儒惟賈生而已至孝武皇帝然後鄒魯梁趙頗有詩禮春秋先師皆起于建元之間當此之時一人不能獨盡其經或為雅或為頌相合而成秦誓後得博士集而讀之故詔書稱曰禮壞樂崩書缺簡脫朕甚閔焉時漢興已七八十年離於全經固已遠矣及魯恭王壞孔子宅欲以為宮而得古文於壞壁之中逸禮有三十九書十六篇天漢之

後孔安國獻之遭巫蠱倉卒之難未及施行及春秋左氏丘明所脩皆古文舊書多者二十餘通藏於秘府伏而未發孝成皇帝閔學殘文缺稍離其真乃陳發秘臧校理舊文得此三事以考學官所傳經或脫簡傳或間編傳問民間則有魯國桓公趙國貫公膠東庸生之遺學與此同抑而未施此乃有識者之所惜閔士君子之所嗟痛也往者綴學之士不思廢絕之闕苟因陋就寡分文析字煩言碎詞學者罷老且不能究其一藝信口

說而背傳記是未師而非往古至於國家將有大事若立辟雍封禪巡狩之儀則幽冥而莫知其原猶欲保殘守缺挾恐見破之私意而無從善服義之公心或懷妬嫉不考情實雷同相從隨聲是非抑此三學以尚書為備謂左氏為不傳春秋豈不哀哉今聖上德通神明繼統揚業亦閱文學錯亂學士若茲雖昭其情猶依違謙讓樂與士君子同之故下明詔試左氏可立不遣近臣奉旨銜命將以輔弱扶微與二三君子比意同力冀得

廢遺今則不然深閉固距而不肯試猥以不誦絕之欲以杜塞餘道絕滅微學夫可與樂成難與慮始此乃衆庶之所為耳非所望士君子也且此數家之事皆先帝所親論今上所考視其古文舊書皆有徵驗外內相應豈苟而已哉夫禮失求之於野古文不猶愈於野乎往者博士書有歐陽春秋公羊易則施孟然孝宣皇帝猶廣立穀梁春秋梁丘易大小夏侯尚書義雖相反猶並置之何則與其過而廢之也寧過而立之傳曰文武之

道未墜於地。在人賢者志其大者。不賢者志其小者。今此數家之言。所以兼包大小之義。豈可偏絕哉。若必專已守殘。黨同門。妬道真。違明詔。失聖意。以陷於文吏之

議。甚為二三君子不取也。

漢書桓公一作伯公誤。桓生以頌禮為大夫。貫長卿受

詩毛公並見儒林傳。紀文選作記七十子作七十二子。終作卒。讀作讚三十九下有篇字。間編作脫。編傳問作博。問惜閔作歎。慙文學作文。致考視作考試。寧作與。

答文學

誠思拾遺冀以云補

李善文選注

與揚雄求方言書

雄為郎一歲作繡補靈節龍骨之銘詩三章
及天下上計孝廉雄問異語紀十五卷為輜
軒使者絕代語釋別國方言積二十
七年成帝時歆與揚雄從取方言

歆叩頭昨受詔宓五官郎中田儀與官婢陳徵駱驛等
私通盜刷越巾事即其夕竟歸府詔問三代周秦軒車
使者適人使者以歲八月巡路求代語僮謠歌戲欲得
其最目因從事郝隆求之有日篇中但有其目無見文
者歆先君數為孝成皇帝言當使諸儒共集訓詁爾雅

所及五經所詁不合爾雅者詁籀為病及諸經氏之屬
皆無證驗博士至以窮世之博學者偶有所見非徒無
主而生是也會成帝未以為意先君又不能獨集至於
歆身修軌不暇何惶更創屬聞子雲獨來集先代絕言
異國殊語以為十五卷其所解畧多矣而不知其目非
子雲澹雅之才沈鬱之思不能經年銳精以成此書良
為勤矣歆雖不遘過庭亦克識先君雅訓三代之書蘊
藏於家直不計耳今聞此甚為子雲嘉之已今聖朝留

心典誥發精于殊語欲以驗考四方之事不勞戎馬高
車之使坐知徭俗適子雲攘意之秋也不以是時發倉
廩以振贍殊無為明語將何獨挈之寶上以忠信明于
上下以置恩于罷朽所謂知蓄積善布施也蓋蕭何造
律張倉推歷皆成之于帷幕貢之于王門功列于漢室
名流乎無窮誠以隆秋之時收藏不殆饑春之歲散之
不疑故至于此也今謹使密人奉手書願頗與其最目
得使入錄令聖朝留明明之典歆叩頭叩頭

挈一作絮

議

武帝廟不宜毀議

司徒掾班彪曰漢承亡秦絕學之後祖宗之制因時施宜

自元成後學者著滋貢禹毀宗廟匡衡改郊兆何武定三公後皆數復故紛紛不定何者禮文缺微古今異制各為一家未易可偏定也考觀諸儒之議劉歆博而篤矣此與王

舜同議據漢書

歆所撰議也

臣聞周室既衰四夷竝侵獫狁最彊於今匈奴是也至宣王而伐之詩人美而頌之曰薄伐獫狁至于太原又曰嘽嘽推推如霆如雷顯允方叔征伐獫狁荆蠻來威

故稱中興及至幽王犬戎來伐殺幽王取宗器自是之後南夷與北狄交侵中國不絕如綫春秋紀齊桓南伐楚北伐山戎孔子曰微管仲吾其被髮左衽矣是故棄桓之過而錄其功以為伯首及漢興冒頓始強破東胡禽月氏并其土地地廣兵彊為中國害南粵尉佗總百粵自稱帝故中國雖平猶有四夷之患且無寧歲一方有急三面救之是天下皆動而被其害也孝文皇帝厚以貨賂與結和親猶侵暴無已甚者興師十餘萬衆近

屯京師及四邊歲發屯備虜其為患久矣非一世之漸也諸侯郡守連匈奴及百粵以為逆者非一人也匈奴所殺郡守都尉略取人民不可勝數孝武皇帝愍中國罷勞無安寧之時乃遣大將軍驃騎伏波樓船之屬南滅百粵起七郡北攘匈奴降昆邪十萬之衆置五屬國起朔方以奪其肥饒之地東伐朝鮮起玄菟樂浪以斷匈奴之左臂西伐大宛并三十六國結烏孫起敦煌酒泉張掖以鬲婼羌裂匈奴之右肩單于孤特遠遁於幕

北四垂無事斥地遠境起十餘郡功業既定乃封丞相
為富民侯以大安天下富實百姓其規撫可見又招集
天下賢俊與協心同謀興制度改正朔易服色立天地
之祠建封禪殊官號存周後定諸侯之制永無逆爭之
心至今累世賴之單于守藩百蠻服從萬世之基也中
興之功未有高焉者也高帝建大業為太祖孝文皇帝
德至厚也為文太宗孝武皇帝功至著也為武世宗此
孝宣帝所以發德音也禮記王制及春秋穀梁傳天子

七廟諸侯五大夫三士二天子七日而殯七月而葬諸侯五日而殯五月而葬此喪事尊卑之序也與廟數相應其文曰天子三昭三穆與太祖之廟而七諸侯二昭二穆與太祖之廟而五故德厚者流光德薄者流卑春秋左氏傳曰名位不同禮亦異數自上以下降殺以兩禮也七者其正法數可常數者也宗不在此數中宗變也苟有功德則宗之不可預為設數故於殷太甲為太宗太戊曰中宗武丁曰高宗周公為母逸之戒舉殷三

宗以勸成王繇是言之宗無數也然則所以勸帝者之功德博矣以七廟言之孝武皇帝未宜毀以所宗言之則不可謂無功德禮記祀典曰夫聖王之制祀也功施於民則祀之以勞定國則祀之能救大災則祀之竊觀孝武皇帝功德皆兼而有焉凡在於異姓猶將特祀之況於先祖或說天子五廟無見文又說中宗高宗者宗其道而毀其廟名與實異非尊德貴功之意也詩云蔽芾甘棠勿剪勿伐邵伯所爰思其人猶愛其樹況宗其

道而毀其廟乎迭毀之禮自有常法無殊功異德固以親疎相推及至祖宗之序多少之數經傳無明文至尊至重難以疑文虛說定也孝宣皇帝舉公卿之議用衆儒之謀既以為世宗之廟建之萬世宣布天下臣愚以為孝武皇帝功烈如彼孝宣皇帝崇立之如此不宜毀

太上惠景寢園議

禮去事有殺故春秋外傳曰日祭月祀時享歲貢終王祖禰則日祭曾高則月祀二祧則時享壇墠則歲貢大

禘則終王德盛而游廣親親之殺也彌遠則彌尊故禘
為重矣孫居王父之處正昭穆則孫常與祖相代此遷
廟之殺也聖人於其祖出於情矣禮無所不順故無毀
廟自貢禹建迭毀之議惠景及太上寢園廢而為虛失
禮意矣

王莽服母總繯議

居攝二年莽母功顯君死意
不在哀令太后詔議其服少

阿義和劉歆與博士諸儒
七十八人議莽遂行焉

居攝之義所以統立天功興崇帝道成就法度安輯海

內也昔殷成湯既沒而太子蚤夭其子太甲幼少不明
伊尹放諸桐宮而居攝以興殷道周武王既沒周道未
成成王幼少周公屏成王而居攝以成周道是以殷有
翼翼之化周有刑措之功今太皇太后比遭家之不造
委任安漢公宰尹羣僚衡平天下遭孺子幼少未能共
上下皇天降瑞出丹石之符是以太皇太后則天明命
詔安漢公居攝踐祚將以成聖漢之業與唐虞三代比
隆也攝皇帝遂開祕府會羣儒制禮作樂卒定庶官茂

成天功聖心周悉卓爾獨見發得周禮以明因監則天
稽古而損益焉猶仲尼之聞韶日月之不可階非聖哲
之至孰能若茲綱紀咸張成在一匱此其所以保佑聖
漢安靖元元之效也今功顯君薨禮庶子為後為其母
總傳曰與尊者為體不敢服其私親也攝皇帝以聖德
承皇天之命受太后之詔居攝踐祚奉漢太宗之後上
有天地社稷之重下有元元萬機之憂不得顧其私親
故太皇太后建厥元孫俾侯新都為哀侯後明攝皇帝

與尊者為體承宗廟之祭奉共養太皇太后不得服其私親也周禮曰王為諸侯總繅弁而加環經同姓則麻異姓則葛攝皇帝當為功顯君總繅弁而加麻環經如天子弔諸侯服以應聖制

奏

上鄧析子

中鄧析書四篇臣叙書一篇凡中外書五篇以相校除復重為一篇皆定殺青書可繕寫也鄧析者鄭人也好

刑名操兩可之說設無窮之辭當子產之世數難子產之法記或云子產起而戮之於春秋左氏傳昭公二十年而子產卒子太叔嗣為政定公八年太叔卒駟歆嗣為政明年乃殺鄧析而用其竹刑君子謂子歆於是乎不忠苟有可以加于國家棄其邪可也靜女之三章取彤管焉竿旄何以告之取其忠也故用其道不棄其人詩之蔽芾甘棠勿剪勿伐召伯所茇思其人猶愛其樹也況用其道不恤其人乎然無以勸能矣竹刑簡法也

久遠世無其書子產卒後二十年而鄧析死傳說或稱子產誅鄧析非也其論無厚者言之異同與公孫龍同類謹第上

說

三統歷說

漢書云初孝成世劉向總六歷列是非作五紀論向子歆究其微眇作三

統歷及譜以說春秋
推法密要故述焉

夫歷春秋者天時也列人事而因以天時傳曰民受天地之中以生所謂命也是故有禮誼動作威儀之則以

定命也能者養之以福不能者敗以取禍故列十二公
二百四十二年之事以陰陽之中制其禮故春為陽中
萬物以生秋為陰中萬物以成是以事舉其中禮取其
和歷數以閏正天地之中以作事厚生皆所以定命也
易金火相革之卦曰湯武革命順乎天而應乎人又曰
治歷明時所以和人道也周道既衰幽王既喪天子不
能班朔魯歷不正以閏餘一之歲為部首故春秋刺十
一月乙亥朔日有食之於是辰在申而司歷以為在建

戊史書建亥亥十二年亦以建申流火之月為建亥而怪蟄蟲之不伏也自文公閏月不告朔至此百有餘年莫能正歷數故子貢欲去其餼羊孔子愛其禮而著其法於春秋經曰冬十月朔日有食之傳曰不書日官失之也天子有日官諸侯有日御日官居卿以底日禮也日御不失日以授百官於朝言告朔也元典歷始曰元傳曰元善之長也共養三德為善又曰元禮之長也合三體而為之原故曰元於春三月每月書王元之三統

也三統合於一元故因元一而九三之以為法十一三之以為實實如法得一黃鍾初九律之首陽之變也因而六之以九為法得林鍾初六呂之首陰之變也皆參天兩地之法也上生六而倍之下生六而損之皆以九為法九六陰陽夫婦子母之道也律取妻而呂生子天地之情也六律六呂而十二辰立矣五聲清濁而十日行矣傳曰天六地五數之常也天有六氣降生五味夫五六者天地之中合而民所受以生也故日有六甲辰

有五子十一而天地之道畢言終而復始太極中央元氣故為黃鍾其實一龠以其長自乘故八十一為日法所以生權衡度量禮樂之所繇出也經元一以統始易太極之首也春秋二目目歲易兩儀之中也於春每月書王易三極之統也於四時雖亡事必書時月易四象之節也時月以建分至啟閉之分易八卦之位也象事成敗易吉凶之効也朝聘會盟易大業之本也故易與春秋天人之道也傳曰龜象也筮數也物生而後有象

象而後有滋滋而後有數是故元始有象一也春秋二也三統三也四時四也合而為十成五體呂五乘十大衍之數也而道據其一其餘四十九所當用也故著以為數呂象兩兩之又呂象三三之又以象四四之又歸奇象閏十九及所據一加之因呂再扞兩之是為月法之實如日法得一則一月之日數也而三辰之位交矣是呂能生吉凶故易曰天一地二天三地四天五地六天七地八天九地十天數五地數五五位相得而各有

合天數二十有五地數三十凡天地之數五十有五此
所由成變化而行鬼神也并終數為十九易窮則變故
為閏法參天九兩地十是為會數參天數二十五兩地
數三十是為朔望之會呂會數乘之則周於朔旦冬至
是為會月九會而復元黃鍾初九之數也經於四時雖
亡事必書時月時所以紀啓閉也月所以紀分至也啓
閉者節也分至者中也節不必在其月故時中必在正
數之月故傳曰先王之正時也履端於始舉正於中歸

餘於終履端於始序則不愆舉正於中民則不惑歸餘
於終事則不諱此聖王之重閏也以五位乘會數而朔
旦冬至是為章月四分月法以其一乘章月是為中法
參閏法為周至以乘月法以減中法而約之則六朞之
數為一月之閏月其餘七分此中月相求之術也朔不
得中是為閏月言陰陽雖交不得中不生故曰法乘閏
法是為統歲三統是為元歲元歲之閏陰陽災三統閏
法易九疋曰初入元百六陽九次三百七十四陰九次

四百八十陽九次七百二十陰七次七百二十陽七次
六百陰五次六百陽五次四百八十陰三次四百八十
陽三凡四千六百一十七歲與一元終經歲四千五百
六十災歲五十七是以春秋曰舉正於中又曰閏月不
告朔非禮也閏以正時時以作事事以厚生生民之道
於是乎在矣不告閏朔棄時正也何以為民故魯僖五
年春正月辛亥朔日南至公既視朔遂登觀臺以望而
書禮也凡分至啟閉必書雲物為備故也至昭二十年

二月己丑日南至失閏至在非其月梓慎望氛氣而弗
正不履端於始也故傳不曰冬至而曰日南至極於牽
牛之初日中之時景最長以此知其南至也斗綱之端
連貫營室織女之紀指牽牛之初以紀日月故曰星紀
五星起其初日月起其中凡十二次日至其初為節至
其中斗建下為十二辰視其建而知其次故曰制禮上
物不過十二天之大數也經曰春王正月傳曰周正月
火出於夏為三月商為四月周為五月夏數得天得四

時之正也三代各據一統明三統常合而迭為首登降
三統之首周還五行之道也故三五相包而生天統之
正始施於子半日萌色赤地統受之於丑初日肇化而
黃至丑半日牙化而白人統受之於寅初日孽成而黑
至寅半日生成而青天施復於子地化自丑畢於辰人
生自寅成於申故歷數三統天以甲子地以甲辰人以
甲申孟仲季迭用事為統首三微之統既著而五行自
青始其序亦如之五行與三統相錯傳曰天有三辰地

有五行然則三統五星可知也易曰參五以變錯綜其數通其變遂成天地之文極其數遂定天下之象太極運三辰五星於上而元氣轉三統五行於下其於人皇極統三德五事故三辰之合於三統也日合於天統月合於地統斗合於人統五星之合於五行水合於辰星火合於熒惑金合於太白木合於歲星土合於填星三辰五星而相經緯也天以一生水地以二生火天以三生木地以四生金天以五生土五勝相乘以生小周以

乘乾坤之策而成大周陰陽比類交錯相乘故九六之變登降於六體三微而成著三著而成象二象十有八變而成卦四營而成易為七十二參三統兩四時相乘之數也參之則得乾之策兩之則得坤之策以陽九九之為六百四十八以陰六六之為四百三十二凡一千八十陰陽各一卦之微筭策也八之為八千六百四十而八卦小成引而信之又八之為六萬九千一百二十天地再之為十三萬八千二百四十然後大成五星會

終觸類而長之以乘章歲為二百六十二萬六千五百六十而與日月會三會為七百八十七萬九千六百八十而與三統會三統二千三百六十三萬九千四十而復於太極上元九章歲而六之為法太極上元為實實如法得一陰一陽各萬一千五百二十當萬物氣體之數天下之能事畢矣

論

新序論

史記商君傳末注
載劉歆新序論

秦孝公保崤函之固以廣雍州之地東并河西北收上
郡國富兵彊長雄諸侯周室歸籍四方來賀為戰國霸
君秦遂以彊六世而并諸侯亦皆商君之謀也夫商君
極身無二慮盡公不顧私使民內急耕織之業以富國
外重戰伐之賞以勸戎士法令必行內不私貴寵外不
偏疏遠是以令行而禁止法出而姦息故雖書云無偏
無黨詩云周道如砥其直如矢司馬法之勵戎士周后
稷之勸農業無以易此此所以并諸侯也故孫卿曰四

世有勝非幸也數也然無信諸侯畏而不親夫霸君若
齊桓晉文者桓不倍柯之盟文不負原之期而諸侯畏
其彊而親信之存亡繼絕四方歸之此管仲舅犯之謀
也今商君倍公子邛之舊恩棄交魏之明信詐取三軍
之衆故諸侯畏其彊而不親信也藉使孝公遇齊桓晉
文得諸侯之統將合諸侯之君驅天下之兵以伐秦秦
則亡矣天下無桓文之君故秦得以兼諸侯衛鞅始自
以為知霸王之德原其事不諭也昔周召施善政及其

死也後世思之蔽芾甘棠之詩是也嘗舍於樹下後世思其德不忍伐其樹況害其身乎管仲奪伯氏邑三百戶無怨言今衛鞅內刻刀鋸之刑外深鈇鉞之誅步過六尺者有罰棄灰於道者被刑一日臨渭而論囚七百餘人渭水盡赤號哭之聲動於天地畜怨積讐比於丘山所逃莫之隱所歸莫之容身死車裂滅族無姓其去霸王之佐亦遠矣然惠王殺之亦非也可輔而用也使衛鞅施寬平之法加之以恩申之以信庶幾霸者之佐

哉

洪範五行傳

五行

伏羲氏繼天而王受河圖則而畫之八卦是也禹治洪水賜雒書法而陳之洪範是也聖人行其道而寶其真降及于殷箕子在父師位而典之周既克殷以箕子歸武王親虛已而問焉故經曰惟十有三祀王訪于箕子王廼言曰烏呼箕子惟天陰隲下民相協厥居我不知

其彛倫道叙箕子廼言曰我聞在昔鯀陞洪水汨陳其
五行帝乃震怒弗畀洪範九疇彛倫道數鯀則殛死禹
廼嗣興天廼錫禹洪範九疇彛倫道叙此武王問雒書
於箕子箕子對禹得雒書之意也初一日五行次二曰
羞用五事次三曰農用八政次四曰乂用五紀次五曰
建用皇極次六曰乂用三德次七曰明用稽疑次八曰
念用庶徵次九曰嚮用五福畏用六極凡此六十五字
皆雒書本文所謂天廼錫禹大法九章常事所次者也

以為河圖雒書相為經緯八卦九章相為表裏昔殷道弛文王演周易周道敝孔子述春秋則乾坤之陰陽效洪範之咎徵天人之道粲然著矣

正月雨水冰

成公十六年

上陽施不下通下陰施不上達故雨而木為之冰霧氣寒木不曲直也

八月壬申御廩災

桓公十四年

御廩公所親耕籍田以奉粢盛者也棄法度亡禮之應

也

春石言於晉

昭公八年

金石同類是為金不從革失其性也

秋大水

桓公元年

桓易許田不祀周公廢祭祀之罰也

大水

嚴公二十四年

先是嚴飾宗廟刻桷丹楹以夸夫人簡宗廟之罰也

恒雨

書

貌傳曰有鱗蟲之孽羊旣鼻病

三月癸酉大雨震電庚辰大雨雪

隱公九年

三月癸酉於歷數春分後一日始震電之時也當雨而不當大雨大雨常雨之罰也於始震電八日之間而大雨雪常寒之罰也

八月大雩

昭公三年

昭公即位年十九矣猶有童心居喪不哀炕陽失衆

八月大雩

昭公二十四年

左氏傳二十三年邾師城翼還經魯地魯襲取邾師獲其三大夫邾人慙於晉晉人執我行人叔孫婼是春廼歸之

七月上辛大雩季辛又雩

昭公二十五年

時邠氏與季氏有隙又季氏之族有淫妻為讒使季平子與族人相惡皆共讒平子子家駒諫曰讒人以君微幸不可昭公遂伐季氏為所敗出奔齊

恒與書

屬思心不容於易剛而色柔為離離為火為目羊上角
下號剛而色柔羊大目而不精明視氣毀故有羊旣二闕
字視傳曰有羽蟲之孽雞旣

十二月隕霜不殺草

僖公三十三年

草妖也

高宗祭成湯有蜚雉登鼎耳而雊

羽蟲之孽易有鼎卦鼎宗廟之器主器奉宗廟者長子
也野鳥自外來入為宗廟器主是繼嗣將易也

十二月李梅實

傳公三十三年

庶徵皆以蟲為孽思心羸蟲孽也李梅實屬草妖

夏有鸛鵒來巢

昭公二十五年

羽蟲之孽其色黑又黑祥也視不明聽不聰之罰也

恒寒

聽傳曰有介蟲孽也

庶徵之恒寒

大雨雪及未當雨雪而雨雪及大雨雹霜殺菽草皆

常寒之罰也

秋螽

桓公五年

貪虐取民則螽介蟲之孽也與魚同占

有蜚

嚴公二十九年

負蟄也性不食穀食穀為災介蟲之孽

秋雨螽於宗

文公三年

螽為穀災卒遇賊陰墜而死也

十二月螽

哀公十二年

周十二月夏十月也火星既伏蟄蟲皆畢天之見變因物類之宜不得以螽是歲再失閏矣周九月夏七月故傳曰火猶西流司歷過也

冬螽生

宣公十五年

螽蟪蠹之有翼者食穀為災黑青也

恒風

思心傳曰時則有羸蟲之孽謂螟螣之屬也

九月己卯晦震夷伯之廟

釐公十五年

春秋及朔言朔及晦言晦人道所不及則天震之展氏
有隱慝故天加誅於其祖夷伯之廟以譴告之也成公
十六年六月甲午晦晉侯及楚子鄭伯戰于鄆陵皆月
晦云

秋螟隱公五年

又逆臧釐伯之諫貪利區霜以生羸蟲之孽也

夏梁山崩成公五年

梁山晉望也崩弛崩也古者三代命祀祭不越望吉凶

禍福不是過也國主山川山崩川竭亡之徵也美惡周
必復是歲歲在鶉火至十七年復在鶉火樂書中行偃
殺厲公而立悼公

恒陰

皇極傳曰有下體生上之疴

秋有蜮

嚴公十八年

蜮盛暑所生非自越來也

敗狄于鹹

文公十一年

人變屬黃祥

二月己巳日有食之穀梁傳曰言日不言朔食

晦公羊傳曰食二日

隱公三年

正月二日燕越之分野也凡日所躔而有變則分野之國失政者受之人君能脩政共御厥罰則災消而福至不能則災消而禍生故經書災而不紀其故蓋吉凶亡常隨行而成禍福也周衰天子不班朔魯歷不正置閏不得其月月大小不得其度史記日食或言朔而實非

朔或不言朔而實朔或脫不書朔與日皆官失之也

七月壬辰朔日有食之既

桓公三年

六月趙與晉分先是晉曲沃伯再弑晉侯是歲晉大亂

滅其宗國

十月朔日有食之

桓公十七年

楚鄭分

三月日有食之

嚴公十八年

晦魯衛分

六月辛未朔日有食之

嚴公二十五年

五月二日魯趙分

十二月癸亥朔日有食之

嚴公二十六年

十月二日楚鄭分

九月庚午朔日有食之

嚴公三十年

八月秦周分

九月戊寅朔日有食之

僖公五年

七月秦晉分

三月庚午朔日有食之

僖公十二年

三月齊魯分

五月日有食之

僖公十五年

二月朔齊越分

二月癸亥日有食之

文公元年

正月朔燕越分

六月辛丑朔日有食之

文公十五年

四月二日魯衛分

七月甲子日有食之既

宣公八年

十月二日楚鄭分

四月丙辰日有食之

宣公十年

二月魯衛分

六月癸卯日有食之

宣公十七年

三月晦朓魯衛分

六月丙寅朔日有食之

成公十六年

四月二日魯衛分

十二月丁巳朔日有食之
成公十七年

九月周楚分

二月乙未朔日有食之
襄公十四年

前年十二月二日宋燕分

八月丁巳日有食之
襄公十五年

五月二日魯趙分

十月丙辰朔日有食之
襄公二十年

八月秦周分

九月庚戌朔日有食之

襄公二十一年

七月秦晉分

十月庚辰朔日有食之

八月秦周分

二月癸酉朔日有食之

襄公二十三年

前年十二月二日宋燕分

七月甲子朔日有食之既

襄公二十四年

五月魯趙分

八月癸巳朔日有食之

六月晉趙分

十二月乙亥朔日有食之

襄公二十七年

九月周楚分

四月甲辰朔日有食之

昭公七年

二月魯衛分

六月丁巳朔日有食之

昭公十五年

三月魯衛分

六月甲戌朔日有食之

昭公十七年

六月二日魯趙分

七月壬午朔日有食之

昭公二十一年

五月二日魯趙分

十二月癸酉朔日有食之

昭公二十二年

十月楚鄭分

五月乙未朔日有食之

昭公二十四年

二日魯趙分是月斗建辰

十二月辛亥朔日有食之

昭公三十一年

二月宋燕分

三月辛亥朔日有食之

定公五年

正月二日燕趙分

十一月丙寅朔日有食之

定公十二年

十二月二日楚鄭分

八月庚辰朔日有食之

定公十五年

六月晉趙分

五月庚申朔日有食之

定公十四年

三月二日齊衛分

八月戊午晨漏未盡三刻有兩月重見

成帝建始元年

舒者侯王展意顓事臣下促急故月行疾也肅者王侯縮胸不任事臣下弛縱故月行遲也當春秋時侯王率多縮胸不任事故食二日仄隱者十八食晦日朏者一此其效也

四月辛卯夜恒星不見夜中星隕如雨

嚴公七年

畫象中國夜象夷狄夜明故常見之星皆不見象中國
微也星隕如雨如而也星隕而且雨故曰與雨偕也明
雨與星隕兩變相成也洪範曰庶民惟星易曰雷雨作
解是歲歲在亥枵齊分野也夜中而星隕象庶民中離
上也雨以解過施復從上下象齊桓行伯復興周室也
周四月夏二月也日在降婁魯分野也先是衛侯朔奔
齊衛公子黔牟立齊以諸侯伐之天子使使救衛魯公
子溺顓政會齊以犯王命嚴弗能止卒從而伐衛逐天

王所立不義至甚而自以為功民去其上政繇下作尤著故星隕於魯天事常象也

七月有星孛入于北斗周史服曰不出七年宋

齊晉之君皆將死亂

文公十四年

北斗有環域四星入其中也斗天之三辰綱紀星也宋齊晉天子方伯中國綱紀彗所以除舊布新也斗七星故曰不出七年至十六年宋人弑昭公十八年齊人弑懿公宣公二年晉趙穿弑靈公

冬有星孛于大辰

昭公十七年

大辰房心尾也八月心星在西方孛從其西過心東及漢也宋大辰虛謂宋先祖掌祀大辰星也陳太昊虛處義木德火所生也鄭祝融虛高辛氏火正也故皆為火所舍衛顓頊虛星為大水營室也天星既然又四國失政相似及為王室亂皆同

冬十一月有星孛于東方

哀公十三年

孛東方大辰也不言大辰旦而見與日爭光星入而彗

猶見是歲再失閏十一月實八月也日在鶉火周分野也

冬有星孛

哀公十四年

不言所在官失之也

正月戊申朔隕石于宋五是月六鵠退飛過宋

都 釐公十六年

是歲歲在壽星其衝降婁降婁魯分野也故為魯多大喪正月日在星紀厭在玄枵齊分野也石山物齊大嶽

後五石象齊桓卒而五公子作亂故為明年齊有亂庶
民惟星隕于宋象宋襄將得諸侯之象而治五公子之
亂星隕而鵠退飛故為得諸侯而不終六鵠象後六年
伯業始退執于孟也民反德為亂亂則妖災生言吉凶
繇人然後陰陽衝厭受其咎齊魯之災非君所致故曰
吾不敢逆君故也

漢魏六朝百三家集卷九

欽定四庫全書

漢魏六朝百三家集卷十

漢馮衍集題詞

馮敬通以野王之孫不仕王莽天下兵起說廉
丹棄新就漢懇款再三丹不悟而死後歸更始
與鮑永田邑拒光武屢招不下更始歿廼降身
亦終廢其所著賦誄銘說問交德誥慎情書記
說自序官錄說策第五十篇遺逸者多即今所傳

慷慨論列可謂長于春秋夫西京之文降而東
京整齊縝密生氣漸少敬通諸文直達所懷至
今讀之尚想見其揚眉抵几呼天飲酒誠哉馬
遷楊惲之徒也北地任女情好不倫書詞詆訶
如磔狐鼠彼惟不得志於時故發憤於中蒿然
亦足為妬婦戒矣幅巾歸誠偃蹇郡邑陰侯之
交亦非得已復以此獲罪幾死獄門窮困無徒
空文自老回思委贄更始橫刀并土之日事同

隔世陸機謂之曰怨江淹名之以恨其知心乎
建武八事其書不傳自陳哀恫不蒙見荅上慚
鮑子下愧田生志命興漢之臣而一生蹈後夫
之罰是真雨而裴堂而簾矣顯宗欲用其身而
毀者日至肅宗重其文而其人已死馮氏多賢
遇者希少新豐地脉久安在哉孟堅詳雅平子
淵博高步東漢若言豁達激昂鷹揚文囿則必
首敬通云

目錄

賦

顯志賦

疏

自陳疏

奏記

奏記鄧禹

牋

與鄧禹牋

書

與田邑書

說鄧禹書

與鄧禹書

與陰就書

出獄後與陰就書

與婦弟任武達書

與宣孟書

論

自論

銘

刀陽銘

刀陰銘

杖銘

杯銘

車銘

漢魏六朝百三家集卷十目錄

欽定四庫全書

漢魏六朝百三家集卷十

明 張溥 輯

漢馮衍集

賦

顯志賦

開歲發春兮百卉含英
甲子之朝兮汨吾西征
發軔新豐兮襄回鎬京
陵飛廉而太息兮登平陽而懷傷悲時

俗之險阨兮哀好惡之無常棄衡石而意量兮隨風波
而飛揚紛綸流於權利兮親雷同而妒異獨耿介而慕
古今豈時人之所意沮先聖之成論兮邇名賢之高風
忽道德之珍麗兮務富貴之樂耽遵大路而褻回兮履
孔德之窈冥固衆夫之所眩兮孰能觀於無形行勁直
以離尤兮羌前人之所有內自省而不慙兮遂定志而
弗改欣吾黨之唐虞兮愍吾生之愁勤聊發憤而揚情
兮將以蕩夫憂心往者不可攀援兮來者不可與期病

沒世之不稱兮願橫逝而無由陟雍時而消搖兮超略
陽而不反念人生之不再兮悲六親之日遠陟九峻而
臨薨薛兮聽涇渭之波聲顧鴻門而歔歔兮哀吾孤之
早零何天命之不純兮信吾罪之所生傷誠善之無辜
兮賡此恨而入冥嗟我思之不遠兮豈敗事之可悔雖
九死而不眠兮恐餘殃之有再淚沈瀾而雨集兮氣滂
渟而雲披心拂鬱而紆結兮意沈抑而內悲瞰太行之
嵯峨兮觀壺口之崢嶸悼丘墓之蕪穢兮恨昭穆之不

榮歲忽忽而日邁兮壽冉冉其不與恥功業之無成兮
赴原野而窮處昔伊尹之干湯兮七十說而乃信臯陶
釣於雷澤兮賴虞舜而後親無二士之遭遇兮抱忠貞
而莫達率妻子而耕耘兮委厥美而不伐韓盧抑而不
縱兮騏驥絆而不試獨慷慨而遠覽兮非庸庸之所識
卑衛賜之阜貨兮高顏回之所慕重祖考之洪烈兮故
收功於此路循四時之代謝兮分五土之刑德相林麓
之所產兮嘗水泉之所殖修神農之本業兮採軒轅之

奇策追周棄之遺教兮軼范蠡之絕迹陟隴山以踰望
兮眇然覽於八荒風波飄其竝興兮情惆悵而增傷覽
河華之泱泱兮望秦晉之故國憤馮亭之不遂兮愠去
疾之遭惑流山岳而周覽兮徇碣石與洞庭浮江河而
入海兮沂淮濟而上征瞻燕齊之舊居兮厯宋楚之名
都哀羣后之不祀兮痛列國之為墟馳中夏而升降兮
路紆軫而多艱講聖哲之通論兮心怫憶而紛紜惟天
路之同軌兮或帝王之異政堯舜煥其蕩蕩兮禹承平

而革命并日夜而幽思兮終餘憚而洞疑高陽顰其超
遠兮世孰可與論茲訊夏啓於甘澤兮傷帝典之始傾
頌成康之載德兮詠南風之歌聲思唐虞之晏晏兮揖
稷契與為朋苗裔紛其條暢兮至湯武而勃興昔三后
之純粹兮每季世而窮禍弔夏桀於南巢兮哭殷紂於
牧野詔伊尹於亳郊兮享呂望於鄴洲功與日月齊光
兮名與三王爭流楊朱號乎衢路兮墨子泣乎白絲知
漸染之易性兮怨造作之弗思美關雎之識微兮愍王

道之將崩拔周唐之盛德兮据桓文之謫功忿戰國之
構禍兮憎權臣之擅彊黜楚子於南郢兮執趙武於澳
梁善忠信之救時兮惡詐謀之妄作聘申叔於陳蔡兮
禽荀息於虞虢誅犂鉏之介聖兮討臧倉之慙知嬖子
反於彭城兮爵管仲於夷儀疾兵革之寢滋兮苦攻伐
之萌生沈孫武於五湖兮斬白起於長平惡叢巧之亂
世兮毒縱橫之敗俗流蘓秦於洹水兮幽張儀於鬼谷
澄德化之陵遲兮烈刑罰之峭峻燔商鞅之法術兮燒

韓非之說論誚始皇之跋扈兮投李斯於四裔滅先王之法則兮禍浸淫而弘大援前聖以制中兮矯二主之驕奢饁女齊於絳臺兮饗椒舉於章華摘道德之光耀兮匡衰世之眇風衰宋襄於泓谷兮表季札於延陵撫仁智之英華兮激亂國之末流觀鄭僑於漆洧兮訪晏嬰於營丘日曠曠其將暮兮獨於邑而煩惑夫何九州之博大兮迷不知路之南北駟素虯而馳騁兮乘翠雲而相佯就伯夷而折中兮得務光而愈明歎子高於中

野兮遇伯成而定慮欽真人之德美兮淹躊躇而弗去
意斟懽而不澹兮俟回風而容與求善卷之所存兮遇
許由於負黍輶吾車於箕陽兮秣吾馬於潁潁聞至言
而曉領兮還吾反乎故宇覽天地之幽奧兮統萬物之
維綱究陰陽之變化兮昭五德之精光躍青龍於滄海
兮豢白虎於金山鑿巖石而為室兮託高陽以養仙神
雀翔於鴻崖兮玄武潛於嬰冥伏朱樓而四望兮採三
秀之華英纂前修之夸節兮曜往昔之光勲披綺季之

麗服兮揚屈原之靈芬高吾冠之岌岌兮長吾佩之洋洋
飲六醴之清液兮食五芝之茂英捷六枳而為籬兮
築蕙若而為室播蘭芷於中庭兮列杜衡於外術攢射
干雜靡蕪兮構木蘭與辛夷光扈扈而煬燿兮紛郁郁
而暢美華芳煜其發越兮時恍惚而莫貴非惜身之埶
軻兮憐衆美之憔悴游精神於大宅兮抗玄妙之常操
處清靜以養志兮實吾心之所樂山峨峨而造天兮林
冥冥而暢茂鸞回翔索其羣兮鹿哀鳴而求其友誦古

今以散思兮覽聖賢以自鎮嘉孔丘之知命兮大老聃
之貴玄德與道其孰寶兮名與身其孰親陂山谷而間
處兮守寂寞而存神夫莊周之釣魚兮辭卿相之顯位
於陵子之灌園兮似至人之髣髴蓋隱約而得道兮羗
窮悟而入術離塵垢之窈冥兮配喬松之妙節惟吾志
之所庶兮固與俗其不同既俶儻而高引兮願觀其從
容

疏

自陳疏

臣伏念高祖之略而陳平之謀毀之則疏譽之則親以文帝之明而魏尚之忠繩之以法則為罪施之以德則為功逮至晚世董仲舒言道德見妬於公孫弘李廣奮節於匈奴見排於衛青此忠臣之常所為流涕也臣行自惟微賤之臣上無無知之薦下無馮唐之說乏董生之才寡李廣之勢而欲免讒口濟怨嫌豈不難哉臣行在先祖以忠貞之故成私門之禍而臣行復遭擾攘之

時值兵革之際不敢回行求時之利事君無傾邪之謀
將帥無虜掠之心衛尉陰興敬慎周密內自修勅外遠
嫌疑故敢與交通興知臣之貧數欲本業之臣自惟無
三益之才不敢處三損之地固讓而不受之昔在更始
太原執貨財之柄居倉卒之間據位食祿二十餘年而
財產歲狹居處日貧家無布帛之積出無輿馬之飾於
今遭清明之時飭躬力行之秋而怨讎叢興譏議橫世
蓋富貴易為善貧賤難為工也疏遠壠畝之臣無望高

闕之下惶恐自陳以救罪尤

奏記

奏記鄧禹

衍聞明君不惡切慙之言以測幽冥之論忠臣不顧爭引之患以達萬機之變是故君臣兩興功名兼立銘勒金石令聞不忘今衍幸逢寬明之日將值危言之時豈敢拱默避臯而不竭其誠哉伏念天下離王莽之害久矣始自東郡之師繼以西海之役巴蜀沒於南夷緣邊

破於北狄遠征萬里暴兵累年禍罕未解兵連不息刑
法彌深賦歛愈重衆彊之黨橫擊於外百僚之臣貪殘
於內元元無聊饑寒並臻父子流亡夫婦離散廬落丘
墟田疇蕪穢疾疫大興災異蠭起於是江湖之上海岱
之濱風騰波湧更相貽藉四垂之人肝腦塗地死亡之
數不啻太半殃咎之毒痛入骨髓匹夫僮婦咸懷怨怒
皇帝以聖德靈威龍興鳳舉率宛葉之衆將散亂之兵
呶血昆陽長驅武關破百萬之陳摧九虎之軍雷震四

海席卷天下攘除禍亂誅滅無道一暮之間海內大定
繼高祖之休烈脩文武之絕業社稷復存炎精更輝德
冠往初功無與二天下自以去亡新就聖漢當蒙其福
而賴其願樹恩布德易以周洽其猶順驚風而蜚鴻毛
也然而諸將虜掠逆倫絕理殺人父子妻人婦女燔其
室屋略其財產饑者毛食寒者裸跣冤結失望無所歸
命今大將軍以明淑之德秉大使之權統三軍之政府
撫并州之人惠愛之誠加乎百姓高世之聲聞乎羣士

故其延頸企踵而望者非特一人也且大將軍之事豈得珪璧其行束修其心而已哉將定國家之大業成天地之元功也昔周宣中興之主齊桓霸彊之君耳猶有申伯召虎夷吾吉甫攘其蝥賊安其疆宇況乎萬里之漢明帝復興而大將軍為之梁棟此誠不可以忽也且衍聞之兵久則力屈人愁則變生今邯鄲之賊未滅真定之際復擾而大將軍所部不過百里守城不休戰軍不息兵革雲翔百姓震駭奈何自怠不為深憂夫并州

之地東帶名關北逼彊胡年穀獨熟人庶多資斯四戰之地攻守之場也如其不虞何以待之故曰德不累積人不為用備不豫具難以應卒今生人之命縣於將軍將軍所杖必須良才宜改易非任更選賢能夫十室之邑必有忠信審得其人以承大將軍之明則雖山澤之人無不感德思樂為用矣然後簡精銳之卒發屯守之士三軍既整兵甲已具相其土地之饒觀其水泉之利制屯田之術習戰射之教則威風遠暢人安其業矣若

鎮太原撫上黨收百姓之歡心樹名賢之良佐天下無
變則足以顯聲譽一朝有事則可以建大功惟大將軍
開日月之明發深淵之慮監六經之論觀孫吳之策省
羣議之是非詳衆士之白黑以超周南之迹垂甘棠之
風令夫功烈施於千載富貴傳于無窮伊望之策何以
加茲

牋

與鄧禹牋

今日裘與蓑孰急見雨則裘不用上堂則蓑不御此更為適者也今敬通逢堂蓑之不御也

書

與田邑書

蓋聞晉文出奔而子犯宣其忠趙武逢難而程嬰明其賢二子之義當矣今三王背畔赤眉危國天下螳動社稷顛隕是忠臣立功之日志士馳馬之秋也伯玉擢選剖符專宰大郡夫上黨之地有四塞之固東帶三關西

為國蔽奈何舉之以資彊敵開天下之匈假仇讎之刃
豈不哀哉衍聞之委質為臣無有二心挈瓶之智守不
假器是以晏嬰臨盟擬以曲戟不易其辭謝息守邲脅
以晉魯不喪其邑由是言之內無鉤頸之禍外無桃菜
之利而被畔人之聲蒙降城之恥竊為左右羞之且邾
庶其竊邑畔君以要大利曰賤而必書莒牟夷以土地
求食而名不滅是以大丈夫動則思禮行則思義未有
背此而身名能全者也為伯玉深計莫若與鮑尚書同

情戮力顯忠貞之節立超世之功如以尊親係累之故能捐位投命歸之尚書大義既全敵人紆怨上不損剖符之責下足救老幼之命申眉高談無媿天下若乃貪上黨之權惜全邦之實行恐伯玉必懷周趙之憂上黨復有前年之禍昔晏平仲納延陵之誨終免欒高之難孫林父違穆子之戒故陷終身之惡以為伯玉聞此至言必若刺心自非嬰城而堅守則策馬而不顧也聖人轉禍而為福智士因敗以成勝願自強于時無與俗同

又太平御覽云今以一節之任建三軍之威豈得寵其八尺之竹龍牛之尾也

說鄧禹書

衍聞昔者先王學大道以觀於政夫為君而不明於道上無所承天下無以化民為臣而不明於道進無以事君退無以脩身聖朝天然之資將軍純茂之德誠少游神乎經書之林馳情乎玄妙之中明照於日月而智溢于四海聖朝享堯舜之榮將軍荷稷契之烈自然理也

與鄧禹書

衍以為寫神翰意則聊城之說碧雞之辯不足難也

又太

平御覽載馮書云夫虎
豹愛大林蛟龍愛大水

與陰就書

衍聞神龍驤首幽雲景蒸明聖修德志士思名是以意
同情合聲比則應也伏見君侯忠孝之性慈仁殷勤論
議周密思慮深遠顧以微賤數蒙聖恩被侯大惠衍年
老被病恐一旦無祿命先犬馬懷抱不報齎恨入冥思
剖肝膽有以塞責方今天下安定四海咸服蒙恩更生

之臣無所效其死力側聞東平山陽王壯當之國擇除
官屬衍不自量願侯白以衍備門衛鄙語曰水不激不
能破舟矢不激不能飲羽不念舊惡名賢所高負責之
臣欲言不敢惟侯哀憐深留聖心則闔棺之日魂復何
恨

出獄後與陰就書

衍材素愚駑行義汙穢外無鄉里之譽內無汗馬之勞
猥蒙明府天覆之德華寵重疊間者掾史疑衍之罪衆

煦飄山當為灰土賴蒙明察揆其素行復保首領倍知
厚德篤於慈父浸淫肌膚滲漉骨髓德重山嶽澤深河
海前送妻子還淄縣遭雨逢暑以七月還至陽武聞詔
捕諸王賓客惶怖詣闕冀先事自歸十一日到十二日
書報歸田里即日束手詣洛陽詔獄十五日夜詔書勿
問得出遭雨又疾大困冀高世之德施以田子老馬之
惠贈以秦穆駿馬之恩使長有依歸以效忠心

與婦弟任武達書

天地之性人有喜怒夫婦之道義有離合先聖之禮士
有妻妾雖宗之眇微尚欲踰制年衰歲暮恨入黃泉遭
遇嫉妬家道崩壞五子之母足尚在門五年已來日甚
歲劇以白為黑以非為是造作端木妄生首尾無罪無
辜讒口嗷嗷亂匪降天生自嬭人青蠅之心不重破國
嫉妬之情不憚喪身北難之晨維家之索古之大患今
始於衍醉飽過差輒為桀紂房中調戲布散海外張目
抵掌以有為無痛徹蒼天毒流五臟愁令人不賴生忿

令人不顧禍入門著牀繼嗣不育紡績織紝了無女工
家貧無僮賤為匹夫故舊見之莫不悽愴曾無憫惜之
恩惟一婢武達所見頭無釵珥面無脂澤形骸不蔽手
足抱土不原其窮不揆其情跳梁大叫呼若入冥販糖
之妾不忍其態計婦當去久矣念兒曹小家無宅使哀
憐姜豹常為奴婢惻惻焦心事事腐腸訕訕籍籍不可
聽聞暴虐此婢不死如髮半年之間膿血橫流婢病之
後姜竟舂炊豹又觸冒泥塗心為愴然鯁穀放散冬衣

不補端坐化亂一縷不貫既無婦道又無母儀忿見侵犯恨見狼藉依倚鄭令如居天上持質相刼詞語百車劒戟在門何暇有讓百弩環舍何可彊復舉宗達人解說詞如循環口如布穀縣幡竟天擊鼓動地心不為惡身不為搖耳宜詳居錯且自為計無以上書告訴相恐狗吠不驚自信其情不去此婦則家不寧不去此婦則家不清不去此婦則福不生不去此婦則身不榮不去此婦則事不成吾數奇命薄端相逢遭自恨以華盛時

不早自定至於垂白家貧身賤之日養癰長疽自生禍殃衍以室家紛然之故損棄衣冠側身山野絕交游之路杜仕宦之門闔門不出心專耕耘以求衣食何敢有功名之路哉

與宣孟書

居室之義人之大倫思厚歡和之節樂定金石之固又自傷前遭不良此有去兩嬖之名事誠不得不然豈中心之所好哉

論

自論

馮子以為大人之德不碌碌如玉落落如石風興雲蒸
一龍一蛇與道翱翔與時變化夫豈守一節哉用之則
行舍之則藏進退無主屈伸無常故曰有法無法因時
為業有度無度與物趣舍常務道德之實而不求當世
之名濶畧杪小之禮蕩佚人間之事正身直行恬然肆
志顧嘗好儻之策時莫能聽用其謀喟然長歎自傷

不遭久棲遲於小官不得舒其所懷抑心折節意悽情
悲夫伐冰之家不利雞豚之息委積之臣不操市井之
利况厯位食祿二十餘年而財產益狹居處益貧惟夫
君子之仕行其道也慮時務者不能興其德為身求者
不能成其功去而歸家復羈旅於州郡身愈據職家彌
窮困卒離飢寒之災有喪元子之禍先將軍葬渭陵哀
帝之崩也營之以為園於是以新豐之東鴻門之上壽
安之中地勢高敞四通廣大南望酈山北屬涇渭東瞰

河華龍門之陽三晉之路西顧鄴鄩周秦之丘宮觀之墟通視千里覽見舊都遂定塋焉退而幽居蓋忠臣過故墟而歔歔孝子入舊室而哀歎每念祖考著盛德於前垂鴻烈於後遭時之禍墳墓蕪穢春秋蒸嘗昭穆無列年衰歲暮悼無成功將西田牧肥饒之野殖生產修孝道營宗廟廣祭祀然後闔門講習道德觀覽乎孔老之論庶幾乎松喬之福上隴阪陟高岡游精宇宙流目八紘歷觀九州山川之體追覽上古得失之風愍道陵

遲傷德分崩夫覩其終必原其始故存其人而詠其道
疆理九野經營五山眇然有思陵雲之意乃自賦自厲
命其篇曰顯志顯志者言光明風化之情昭章玄妙之
思也

銘

刀陽銘

脩爾甲兵用戒不虞見危授命臨事而懼

刀陰銘

溫溫穆穆配天之威苗裔無疆福祿來綏

杖銘


杖莫如信行莫如仁惠而無實怨及爾身趙武之珍子罕之寶二子之迹蓋近於道

杯銘

樂則思舊燕則思懼民之失德乾餱以愆

車銘

乘車必護輪治國必愛民車無輪安處國無民誰與



漢魏六朝百三家集卷十